



左氏百川學海

第十六冊



百川學海

已集

周益公玉堂雜記

蔡邕獨斷

珊瑚鈎詩話

王文正公筆錄

王君玉國老設苑

元章書史

張又新煎茶水記

陳仁玉菌譜

贊甯笥譜

本心蔬食譜

淳熙玉堂雜紀卷上



錢文僖公惟演金坡遺事云舊規學士六人遇聖節共率百二十緡寺中設齋今送五十千與樞密使同開道場前一日赴宴當時所記如此近歲樞密院滿散聖節及貢院賜宴則學士待制皆與而無送錢故事又六參隨樞密班先入止是再拜不舞蹈并遇宣麻不往皆內朝故事也

金坡遺事又云聖節唐時惟六學士及二使

謂中官樞密使

赴待詔雖發書屈亦不與坐又云本朝淳化五年

十月上賦詩一首令待詔吳郢張用和齋以示學

士張洎錢若水又李昌武

宗諤

翰苑雜記學士初授

中謝前一日待詔一名至私第宣召入院聽口宣舞

蹈訖揖待詔上階相見具酒果迎待即以事例物并書致於待詔前熙寧間司馬文正公日記云初除學士待詔李堯卿宣召設香案褥位於庭望闕堯卿稱有敕光再拜堯卿口宣云云光每句應喏畢再拜舞蹈又再拜升階與待詔坐啜茶蓋中朝舊典也今學士院有待詔四人或右選或白身予爲學士忠翊郎錢滋來宣召大略如李馬二公所記而無對揖茶酒之禮例支十千辭云自來虛喝不敢受予強予之常日學士入院坐堂上朱衣吏初贊喝東院錄事某人以下躬喏訖又喝云各祇候次贊喝西院某人以下亦如之最後平贊云待詔旣不名亦不喝各祇候則待詔與院吏固亦有間若平居則視之全與吏等無

由待以茶酒豈將命時不欲吏之邪抑 祖宗時所
遣或翰林他局之待詔邪然唐制發書屈赴聖節禮
已厚矣

李仁父燾續通鑑長編開寶二年 太祖命李昉盧
多遜分直學士院昉前在翰林堂吏因事至者每拜
堂下事已即遣未嘗與坐至是拜堂上更展叙中外
無復曩日之禮昉愕然詢同列則云數年矣

司馬文正公日記云熙寧二年五月癸巳鎖院以奉
安二御容禮成德音降西京囚杖以下放是日丞相
出中書提點魏孝先以下入院授以參政趙抃所封
御前札子茶湯館于虛閣御藥劉有方來茶湯館于
門塾復謁御厨翰林設食致酒果黃昏進首尾詞內

批依此修寫四鼓起讀點句攢點進入明日丞相退
朝宣訖開院淳熙三年十一月八日必大被宣草十
二日冬祀赦黃昏方至院御藥持御封中書門下省
熟狀來繫鞵迎于中門同監門內侍一員俱升廳御
藥先以熟狀授監門共茶湯訖先送御藥出院復與
監門升廳受熟狀付吏又點湯送監門下階館之門
塾而不報謁既熟狀自內出非參政所封故提點官
不來惟中書門下省刑房錄事尚書省刑房主事各
一人穿束同至仍舊繫鞵見之不迎不送不設茶湯
而退守當官四人貼房十數人旅揖階下與文正公
所記多不同至六年九月十二日復被宣草明堂赦
御藥張安中監門梁襄相見如儀惟錄事沈樞主事

李師文茶而不湯院吏云前不設茶誤也守當官等不復廷揖所謂酒饌之賜今皆無之詰朝奏知先出而吏卒輩皆俟三日後宣赦訖乃得歸

太上初遜位上尊號時陳丞相康伯當國集議定命

學士洪景巖遵撰議文然後降詔必大時任察官心

知其非而無由改乾道六年郊祀禮成加上尊號必

大在翰苑始引唐故事乞上帥羣臣過宮表請既允

然後降詔國朝止有人主上母后尊號故冊文稱嗣

皇帝靖康上 教主道君之號徐丞相處仁已命汪

彥章藻代作冊文會有疆事不及行禮紹興三十二

年初上 德壽尊號乃承例用嗣皇帝乾道六年既

上表乞加 尊號而院吏寫表亦稱嗣皇帝私謂未

安謹按唐明皇傳位後顏真卿議肅宗不當於宗廟稱嗣皇帝況親奉表德壽乎以白盧丞相允文丞相難之必令尋例必大思建炎以後遇節朔遥拜 徽宗表是時翰苑多名士必不誤用乃督吏搜舊牘明日果得表本一冊止稱皇帝又按韓文順宗實錄載憲宗上順宗尊號冊文亦稱皇帝臣某此最可據其議遂定

是歲初議於 太上皇帝尊號中加憲天體道四字皇后加慈明二字 必大草詔云太上皇帝與天同大體道之宗 太上皇后如月之明以慈為寶蓋取文意之順耳將宣布而議者謂天聖二年賜 太宗女申國大長公主謚曰慈明當避於是改用明慈二字

宰執云詔書先明而後慈殆默定也

必大與同直院鄭仲益聞既分草皇帝請加上 太

上皇帝皇后尊號牋表諸公謂 太上皇帝自當答

詔頗疑皇后難於措辭 必大請以意共為答誥文意

所及總言父母以該之而不稱予吾之類遂草以進

上甚以為然凡兩答誥皆 必大所草也

上於文字尤欲得體一覽便見是非 必大草 太上

辭尊號第一誥其末云怡神間燕何力之有 上曰

此雖道 太上語畢竟自此起草送去何力之句不

能無嫌 必大遂改作無累於物蓋 上用意至到如

此

淳熙二年六月禮部太常寺申來年 太上皇帝當

慶七十欲將國朝加上尊號并上壽典禮參酌比附
先次討論壬申有旨恭依七月乙酉侍從禮官等就
都堂議加性仁立德至神無為八字而皇后再加二
字為齊明廣慈後兩日禮部趙侍郎雄謂無為二字
與 太上字相連頗涉語忌請改為明武煥文其後
又嘗作至神無為又作成武煥文逮癸卯乃定用性
仁立德無為全美參政龔實之茂良而下尚不以為
然葉丞相衡既主之衆莫能奪八月直院胡長文元
質罷丁卯 上自用必大再直已擬詔草會九月乙
未葉丞相罷龔實首招予及學士王季海共議然後
定為性仁誠德經武緯文遂草宣布詔其頌 太上
皇帝云以德行仁本性誠之固有修文偃武合經緯

之自然 太上皇后云月齊日以得天而能久照坤
順乾而配地是以廣生 上再三稱獎謂數句用經
語該括明備非卿不能爲真大手筆也

大禮降御札旣云札示則當親筆付外近歲同常詔
從院吏寫本行出未知中朝舊事如何乾道九年六
月七日宣當直學士草南郊御札三更進草其間云
乾清坤夷振四方之綱紀星暉海潤兆百世之本支
玉卮每奉於親闈瑞節歲交於鄰境 上改作農扈
屢豐戎軒載戢崇禮樂而四達嘉風俗而再淳玉卮
每奉於親闈美化遂刑於海宇仍批云可改簽抹者
五句意不近於郊祀其欲得體大率如此

己亥三月丁卯詔今歲郊祀以例約束省費旋有旨

未令行出下禮部太常寺議明堂大禮初李仁父主
此說於前郊嘗經集議會近習揚言壽博極羣書却
不曾讀孝經乃不果行至是予以禮部尚書兼翰林
學士與諸儒議曰周公雖攝政而主祭則成王王方
幼冲故周公參稽古制嚴事於明堂其曰嚴父者指
周公能推本武王之志追尊文王之功非謂自主其
祭祀也衆以爲然遂奏臣等竊觀傳載黃帝拜祀上
帝于明堂唐虞祀五帝於五府歷時既久其詳莫得
而聞至禮記始載明堂位一篇言天子負斧依南鄉
而立內之公侯伯子男外之蠻夷戎狄以序而立故
曰明堂也者明諸侯之尊卑也孟子亦曰明堂者王
者之堂也周禮大司樂有冬至圜丘之樂夏至方丘

之樂宗廟九變之樂三者皆大祭祀惟不及明堂豈
非明堂者布政會朝之地成王時嘗於此歌我將之
頌宗祀其祖文王乎後暨漢唐雖有沿革至於祀帝
而配以祖宗多由義起未始執一本朝 仁宗皇祐
中破諸儒異同之論即大慶殿行親享之禮並侑
祖宗從以百神前期朝獻景靈宮享太廟一如郊祀
之制 太上皇帝中興斟酌家法舉行於紹興之初
亦在殿庭蓋得聖經之遺意且國家大祀有四春祈
穀夏雩祀秋明堂冬郊祀是也陛下即位以來固嘗
一講祀穀四躬冬祀惟合宮雩壇之禮猶未親行今
若特舉秋享於義爲允臣等謹據已行典禮及將前
代賀循本朝名儒李泰伯范鎮明堂嚴祖說并治平

中呂誨司馬光等集議近歲李燾奏劄具錄以聞乙亥有旨從之九月上辛以顯肅后忌前改用仲辛行禮辛酉當受誓戒前一日上語宰執足指瘡腫恐妨拜跪欲展季辛又值顯恭后忌如何宰執奏天地尊后忌卑遂降旨用二十六日必大按漢武太初太始征和中屢祀明堂不專用辛方請別卜日詰朝上忽遣中使諭旨都堂夜來傳藥足瘡良愈不必改日但已展誓戒之期若再降旨不張皇否趙相奏此却無妨遂以是日午時集官受誓戒丙寅大雨丁卯鎖院草赦戊辰百執事冒雨入麗正門過後殿請皇帝致齋己巳上乘道遙車朝獻景靈宮入太廟宿齋四日之間兩晝夜傾注通衢殆如溪澗有旨來

早不乘玉輅止用逍遙車徑入北門趨文德殿致齋
朝服導駕官皆改常服應儀仗排立人並放趙相爲
大禮使密諭有司未得放散黃昏後兩驟止夜分內
侍李思恭傳旨御史臺閣門太常寺仍舊乘玉輅應
合行事件疾速施行庚午昧爽駕來登輅必大執綏
上喜曰且得晴霽辛未行禮月色如晝上拜起不倦
以迄于成黎明登樓肆赦簪花過德壽宮人情熙然
赦書乃必大視草其間云惟周成宗祀洛中陟配於
文王惟漢武合祠汶上推嚴於高帝皆用親郊之禮
具殫尊祖之誠於鑠本朝若稽前代倣經路寢有皇
祐之彝儀徧秩羣神有紹興之近制不愆于素可舉
而行蓋欲明著古禮以示來世也後數日加恩羣臣

必大復草趙相制云裸將太宮霖潦驟霽陟恪大寢
月華正中又云鎮定大事如彥博之恢宏貫通羣經
如宋庠之博洽皆紀一時之事且以 仁宗初行明
堂二公實爲相也大禮赦條乃六部諸司條具上省
省中類聚取旨訖即進熟狀降付學士院草赦文本
院并首尾詞大書進入其間多云當議將上取旨蓋
有司擬申如此既經畫旨行赦便是處分不應仍舊
用當議二字 必大爲學士諭令削去院吏持不敢遂
親以筆塗之

大禮 上乘玉輅率命翰林學士執綏備顧問近歲
多闕正負臨時選差他官與五使同降旨淳熙丙申
南郊己亥明堂 必大再爲之按京師用唐顯慶輅嘗

以登封其安固可知元豐改造已不能及今乃紹興
癸亥歲所製 上自太廟服通天冠絳紗袍乘輦至
輅後由木陛以登惟留御藥二官者侍立執綏官先
從旁用小梯攀緣而上衛士以綵繩圍腰繫於箱柱
輅行頗搖兀宸几亦覺危坐云

大禮後 上御樓揭雞竿肆赦皇太子及文武百僚
拜舞于下惟樞密使翰林學士相對侍立樓上丙申
己亥必大扈從再登麗正門望濤江形勢環抱極壯
觀也

乾道七年四月甲子詔皇太子判臨安府用至道故
事也或謂當以太中大夫爲判官通領府事恐名稱
未正遂議改尹而以侍從爲少尹餘判推官用卿監

郎官丁卯將鎖院降麻或又擬宣麻又疑宣麻給告
非待儲貳之禮已已後省官禮官會議於史院檢照
唐太宗征遼命太子監國及大帝命太子受諸司啓
事或詔或制視麻爲重可以作則 上然之庚午偶
當日被宣范紫微成大先以侍講遞宿聞報遽出薄
莫至玉堂御藥李名忘其持御封御筆皇太子某宜領
臨安尹可依此降制三鼓進草因奏此制書既不給
告則當付有司施行竊恐皇太子別無被受欲依自
來詔書體式格換首尾書寫一通降付皇太子今擬
定格式進呈如賜俞允乞速批降付下御筆批依辛
未遂告大廷惟此稀闊盛典適以史官備討論詞臣
參潤色復得宸翰寶藏于家非儒生之榮遇乎

答皇子詔用卿字非是前輩知體則不然其他或汝
或王或公皆當有別

翰苑歲進春端貼子如大內多及時事 太上則詠

遊幸之類 必大嘗自德壽宮後垣趨傳法寺望見一

樓巍然朝士云 太上名之曰聚遠而自題其額仍

大書東坡賴有高樓能聚遠一時收拾與閑人之詩

於屏間又靈隱寺冷泉亭臨安絕景去城既遠難於

頻幸乃即宮中鑿大池續竹筒數里引西湖水注之

其上疊石為山象飛來峰宛然天成 必大作端午帖

子云聚遠樓頭面面風冷泉亭下水溶溶人間炎熱

何由到真是瑤臺第一重蓋謂此也前後頗聞禁籞

大略併記于下宮中分四地分隨時遊覽東地分香

遠梅堂清深竹堂月臺梅坡松菊三徑菊芙蓉竹清妍醪

醪清新木犀芙蓉岡南地分載忻大宴堂御忻忻古太栢

石射廳臨賦山荷子燦錦金林至樂池上半文紅郁李

清曠木犀瀉碧養金處西則冷泉古梅文杏館靜樂牡

丹浣溪大樓子北則絳華羅木亭旱船俯翠茅亭春桃

盤松其詳不可得而知也嘗見御製盤松贊墨本云

天錫瑞木得自嶽岑枝蟠數萬幹不倍尋怒騰雲勢

靜奏琴音凌寒鬱茂當暑陰森封以腴壤適以碧潏

越千萬年以慰我心碑在宮中又汪季路達得御製

祭土地文藁真蹟寶藏之其文云維淳熙五年歲次

戊戌十一月 日 太上皇帝遣具階張宗尹特

設牲牢旨酒珍果香花致祭于本宮土地之神神有

百職職各不同典司草木土示是供我遊湖園乃獲
竒松植之禁苑百態千容婆娑偃蓋夭矯騰龍翠色
凝露清音舞風醉吟閑適予情所鍾壅培封殖久或
力窮鳥鳥外擾蟻蠹內攻神其勦絕勿使能終精邪
竊據盜斧適逢神其呵逐勿使遺蹤常令勁質坐閱
隆冬堅踰五柞弱異雙桐歷千萬年鬱鬱葱葱牲牢
旨酒嗣錄汝功尚饗

歐陽文忠公學士院草錄世已不傳近歲有玉堂集

云是李漢老

邴

編類亦差訛非全書其中却載皇太

子府春端帖子蓋政和宣和間所供今東宮乃闕此
欲引例爲請緣無善本可據且當時不曰宮而曰府

遂止

王安中內制
一例曰閣

淳熙玉堂雜紀卷上

淳熙玉堂雜紀卷中

乾道七年十二月辛酉有旨僕射之名不正欲採周漢舊制改左右丞相令有司討論必大時爲禮部侍郎兼權直學士院又兼同修國史兼實錄院修撰皆當與聞會衆議不齊而虞丞相亦謂同北虜官制遷延至明年正月戊寅僅條具歷代宰相官稱申尚書省禁中即聞之明日遣中使王忘其名來問緩故必大以實奏二月癸卯得御筆云尚書左右僕射可依漢制改作左右丞相學士院降詔登時具草封入乙巳付外施行庚戌從駕過德壽宮既歸得旨赴東華門祇候宣引日已晡聞有內宴小黃門出云恐改日引然不敢退酉後忽宣入選德殿起居畢上微被酒

袖出親札云比來一二大臣同心輔正夙夜匪懈漸革苟且之風以副綜覈之意深可嘉尚今因除授宜示褒典虞允文可特進左丞相梁克家可正奉大夫右丞相御前設小案用牙尺壓蠲紙一幅傍有漆匣小斂硯寘筆墨於玉格必大鞫躬書除目進呈訖奏曰拜相轉官前例固不一今並命而或三或四更取聖裁 上曰以其協心故褒進之然特進一官即少保所以允文三官又問兼樞密使否 上曰今樞密亦非古先改丞相稱呼將來別理會且帶可也又奏所領書局 上曰卿自理會賜坐奏問既改左右相其序位如何 上曰欲升在三少之上三公之下逮閣請起宣坐賜茶飲訖再拜而退御藥李彥直同自

複道秉燭鎖院蓋上意欲其密故不用尋常宣官

之禮金蓮故事今庶幾焉凡鎖院御藥監門中官各

一真御藥留宿其廳鎖院大禮赦先去恐是昧爽再相見

以小字制書本授之送至中門先啓鑰入內即復局

院俟朝退宣麻訖學士乃得歸時虞公獨相梁為參

政聞班列中但謂改易相名及雙制出愕然或疑學

士多轉右相一官有所抑揚不敢辨也按祖宗時

命相多以舊官其後往往遷秩近歲勅局修三省法

乃著令轉三官茲豈當立法乎

乾道七年七月二十六日午後快行家傳旨下學士

院取從官為四川宣撫使體例蓋是時參知政事王

公明炎在蜀三年屢求歸宰相薦吏部侍郎王能甫

之奇為代故來索例必大令回奏云降麻官方屬本院侍從當問三省既暮忽宣鎖至院已秉燭中使出御封御筆乃王炎除樞密使依舊四川宣撫使其密如此吏寫熟狀依例不轉官但加食邑必大方草制未暇細思既得筆依奏方省其誤自寫奏云本朝改官制後以太中大夫為宰執官當時改樞密使為知院事中興以來既復置使首用舊弼故恩數多視宰臣未有以中大夫充者昨汪澈元是通議大夫虞允文太中大夫故不轉官今王炎止是中大夫竊慮合轉左太中大夫仍加封邑庶協近制御筆批依時三鼓批墨尚濕

必大初直院見批荅臣僚章表皆大書其後不過三

兩行表紙盡則接以詔紙數幅文盡乃止然表紙高
詔紙矮參差不等問之掌故並無依據心每疑之其
後徧於執政故家求承平時舊本偶得 仁宗皇祐
間荅孫威敏公沔辭免副樞表則所接之紙高低相
若淳熙乙未再叨寓直閏九月十二日因李參彥穎
王樞淮斷章批荅即具奏照皇祐體式於表後用一
等紙書寫進呈仍乞今後準此施行御筆依遂為定
制

宰執及親王使相太尉生日天章閣排辦牲餼預申

學士院撰詔書及寫賜目一紙各請御寶詔用書詔之寶賜用

錫賜前一日差內侍持賜其詔例畫撰進之日謂如

正月旦生文意必叙歲首而所畫日則是去臘殊不

相應必大為直院奏乞不拘進詔早晚但實畫生日
於後得旨從之遂為定制 祖宗時牲餼外又錫器
幣往往就差子弟姻戚持賜欲其省費也過江惟牲
餼耳米麩本色羊準價皆取之有司酒則臨安醞造
臨時加以黃封拜賜訖與使者同升廳搯笏展讀就
坐茶湯書送錢十五千從人三千天章閣使臣庫子
快行錢酒各有差

淳熙丙申八月庚辰德壽宮遣大璫張去為至都堂
傳旨立翟貴妃為今上皇后明日午後執政奏事皇
后歸姓謝氏乙酉晚快行家來宣鎖院是日侍講刑
部侍郎程泰之已宿直呼馬而出予至內前適與之
遇泰之揚鞭云留詩案上矣酉時出自東華門入對

選德殿 上曰 太上有旨立謝后命卿草制必大
奏合略及歸姓否 上曰不如此四方何由知明言
幼隨乳母可也宣坐賜茶訖御藥王濛同入院二鼓
後進草畢吏呈泰之詩云抖擻身章却冒塵裏蹠顧
影也逡巡鑿坡寓宿非其地蓮燭操文自有真字直
由來同古語位高兼復見今人迎潮有諾無輕爽季
老當年不諉貧謂賜金也予次韻戲之云天街並踏
軟紅塵飛鞚交馳駭徼巡椒殿敢期當制草槐庭元
擬用儒真初謂年兄入相鎖院鬻方偶免冬龜手適市深慙旦
攫人禮絕同僚應有日重濡潤筆乃無貧謂相制亦
賜金也先是七月十九日六曹長貳六人往浙江亭
觀潮泰之在焉惟予以內直不赴晡時大雷雨走筆

戲蔡子平洗云雷轟萬鼓勒潮回無復亭前雪作堆
應為尚書慳且澁盲風恠雨一時來迎潮輕爽之語
指此

淳熙丙申八月乙未都堂召議賜交趾來年曆日詔
書予謂李天祚去冬已薨龍翰未經封拜欲作安南
國王嗣子龍翰執政然之先是予以兵部職事條具
天祚贈典按故事其王初立即封交趾郡王久之進
南平王死則贈侍中南越王 上以天祚自紹興丁
巳嗣位今四十年淳熙元年二月又自南平王特封
安南國王故欲厚其禮予請仍贈侍中追封南越國
正詔可之安南為國蓋曾丞相之失聞奏章行移舊
止稱安南道加封之後浸自尊大文書稱國不復可

改丁酉三月二十四日制授龍翰靜海軍節度觀察
處置等使特進檢校太尉兼御史大夫上柱國安南
國王食邑三千戶食實封壹阡戶仍賜推誠順化功
臣予適當制其云即樂國以肇封既從世襲極真王
而錫命何待次升蓋言不封郡王也交州在唐爲安
南都護府本朝太宗時黎氏奪丁璿節度大中祥
符二年李公蘊復篡之傳子德政至孫日尊嘗稱帝
改元日尊卒乾德嗣卒陽煥嗣卒天祚嗣卒龍翰嗣
生數歲矣制云乃眷一邦茲傳七世自公蘊言之也
其名曰日曰乾曰陽曰天曰龍皆有僭上之意然表
章字如蠅頭幾不可辨玉音每嘉其恭順云
淳熙三年九月二十五日鎖院付下中書門下省熟

狀趙伯圭除使相提舉洞霄宮必大奏按故事宗室戚里或前宰執帶節度使多充宮觀使若至使相自領使無疑昨史浩以使相提舉宮觀者誤也恐自此遂以爲例今具士樽錢忱等例皆是以使相充宮觀使在外任便居住者合取旨改正一更四點進入五點 上批可依士樽等體例除宮觀使

是年十一月二十二日御封付下參知政事錢良臣辭免監修國史日曆所劄子降詔不允必大因奏自來宰執兼領書局多是內尚書省批出局名既至朝廷降勅合行寫正而省吏止奉行內批宰執亦隨勅黃繫銜差誤日久今因答詔輒具言之國史日曆者書名也曰所者官司也今大臣合監修日曆却添一

所字似監修造作之官又如勅令所從官詳定宰執
提舉今却云提舉勅令所此何理也以至國史院會
要玉牒皆為一律合行改正 上以為允其後或是
或否復混淆矣

丁酉九月丙辰宣召侍讀史少保浩錫宴澄碧殿抵
莫送以金蓮燭宿玉堂直廬上命作詩叙此會史進
古詩三十韻云季秋中澣日淳熙隆四禩朝回攬轡
間中使俄傳旨少頃日轉申宣召陪燕喜預令掃玉
堂深夜備棲止悚懼跽承命鳴騶亟穿市絳闕聳皇
居非煙常靡靡入自東華門熊羆森爪士詔許乘肩
輿安徐無跛倚復古距選德相望幾數里脩廊按雲
漢岩堯璨珠藥中途敞金扉恍若蓬壺裏羣山擁蒼

壁四顧環弱水山既日夕佳水亦湛無滓冰簾映綺
疏瓊殿中央峙澄碧耀宸奎龍神爭守視蹈舞上丹
墀天威不違咫奉觴祈萬壽時蒙一啓齒餘波丐鼠
腹酒行不知幾徘徊下瑤席緩步煩玉趾從遊至清
激錫坐談名理泉聲韻琴瑟一洗箏笛耳皇云萬機
暇觀書每來此論道及帝王直欲齊其軌堯舜禹湯
文前身無乃是臣言匪獻諛道實由心起既然明是
心要在力行爾登橋醕餘壘飲興未容已金蓮引雙
燭再拜離階祀玉音寵諭臣此會宜有紀歸途感恩
榮占寫忘翫散 上御製俯同其韻云揖遜荷帝堯
寅恭五元禊治道貴清靜聖言有深旨誰歌元首明
自得股肱喜躋民期仁壽距肯中道止力農樂彼田

坐賈安於市歲行閱豐登國論銷委靡予力初何能
濟濟賴多士矧予有元老中立而不倚居東逾三年
不遠來千里未遂赤松遊輟誦青琅藥皓首持六經
日侍明光裏翼乎鴻遇風縱矣魚在水儒行絕瑕疵
道心無塵滓挺挺松柏姿巉巉山岳峙予惟日萬幾
至仁同一視西成錫小宴促坐才尺咫湛露愧歌周
置酒非封齒歸美見新詩如卿能有幾眷言澄碧行
勝賞得迂趾亦屢引公卿對此談政理虚心欲受人
忠言資逆耳朕瘠天下肥至樂無易此頗念文武疆
六合尚殊軌東都會諸侯宣王昔於是期爾罄嘉謀
使我勲業起勿以方燕頤所書聊復爾卮酒正須醕
話言未能已都護萬年觴何當至庭祀文章藉老手

直筆中興紀載嘉矍鑠翁焉得辭翫散逮十一月壬寅輪當內直申時二刻宣召至清華閣上曰學士宴見無時最爲親近朕和史浩詩待錄示卿可和以進此學士職也又云卿想不甚飲比場宴時見卿面赤却至誠不辭既退中使李肅傳旨賜詩本并戊戌小春茶二十銖葉世英墨五團以代賜酒世英御前墨工也恭進和篇云粵從三代還歲月過千禩時豈無賢君道未契宸旨陛下屢語臣三代而煌煌唐太宗勲業在所喜寇攘旣掃除蠻貊畢至止循良布郡邑惠政寬獄市忠賢儼班聯切諫柅浮靡關輔羅府兵巖穴聘奇士民生覆盂安國勢泰山倚皇心期過之風下九萬里忠厚培本根文物粲華藻淳熙正觀間

何啻相表裏屬車尚濤江列障隔淮水蠢茲獯鬻氏
作我太清洋坐令營屯衆久費糗糧峙中原厭狼貪
諸將空虎視安得貫罟梛來貢尺有咫六合混一家
耕桑盛生齒願言講治道先務當有幾欲仁斯仁至
患在未舉趾而況前史中遺事可尋理衛英爪與牙
王魏目兼耳處中賴房杜虛受忘彼此不聞國異政
但見車同軌孰云古道難僉曰今王是寸陰聖所競
盛德日方起舞干格三苗其効七旬爾軻稱仁無敵
傳謂禮可已東鞮及北女看即朝玉祀南山竹易殫
陛下功難紀儒館謾獻歌將奈詞之敝是日奏事畢
問陛下命臨安府開文海有諸上曰然奏云文選
之後有文粹已遠不及所謂文海乃近時江鈿編類

殊無倫理書坊刊行可也今降旨校正刻板事體則重恐難傳後莫若委館閣官銓擇本朝文章成一代之書 上大以為然曰卿可理會奏乞委館職 上曰待差一兩頁其後遂付呂伯共祖謙既成 上問何以為名必大乞賜名皇朝文鑑 上曰善又降旨令必大作序亦既進呈將刊版會有近臣密啓云所載臣僚章疏毀及 祖宗政事遂不果刻今其書士大夫或傳之

淳熙五年閏六月十二日鎖院付到熟狀皇子魏王自荆南集慶軍節度使開府儀同三司行江陵尹判明州改成德彰信軍節度使行荊州牧必大奏彰信是曹州 徽宗曾為節度使即位後升興仁府又親

王帶牧合隨本鎮今成德軍即真定府却帶荊州牧
非是 上批別擬大鎮進入選點更具本鎮帶牧故
事來必大又奏去夏魏王除荊南節度使江陵尹誤
犯端拱中 真宗除授昔政和中已失檢照今因改
鎮不敢不審兼兩鎮合帶兩牧仍隨本鎮併於實錄
中檢故事以進夏夜甚短奏入已三鼓至四鼓未批
出只於兩鎮上就本鎮止帶一牧必大遂擬永興成
德軍節度使雍州牧進入頃之點定然後進草禁中
未就寢以待

禁中四鼓乃
在外三更

故事食邑千戶以上封侯若拜相雖舊爵卑食邑少
亦徑封侯蓋五等伯子男用縣名至侯則升郡當降
旨時未知所封何郡第云進封開國侯而已秦丞相

薨後初拜沈守約該左相万俟元忠高右相沈爵歸
安縣万俟陽武縣各從其鄉也既相合外郡侯而學
士院遂進沈為歸安郡万俟陽武郡初非郡名其誤
甚矣當時偶不知改久之因進書轉官方能釐正至
今遇恩升郡臣僚院吏及吏部尚復差舛謂如元係
吳興縣開國伯則合云進封吳興郡開國侯却云吳
興郡進封開國侯殊無義理予每為正之

北門掌內制西掖掌外制是謂兩制又著令自觀文
殿大學士至敷文閣待制為侍從官朝廷或詔近臣
舉賢議事多云兩省諫議大夫以上尚書省侍郎以
上而別言御史中丞學士待制乃為詳備近世相承
通稱侍從固已疑混若泛言兩制則非矣

紹興二十四年春直學士院湯公思退以禮部侍郎
同知貢舉時百官多闕大抵一人兼數職凡進士出
身皆入試闈獨留監察御史王公綸蓋備拆號也內
制既闕官遂降旨暫權適草劉婉儀進位貴妃制
太上稱其有典誥體潤筆殆萬緡賜硯尤竒秦丞相
不樂遭論列而去秦薨召還掌內外制知樞密院事
垂相而病除大資政留守金陵即其鄉也未弟時兄
弟就食府庠至是人以爲榮尋卒官予嘗草其致仕
制云少則歌鹿鳴而薦于鄉老則釋麟符而居其里
考昔人而或有在近歲以幾希贈官制云古所謂鄉
先生者沒則祭于社而後世良二千石民亦奉祀之
爾於二者蓋兼之皆紀實也

故事正除六曹侍郎及雜學士以上遇辭免皆降詔
不允給舍并權侍郎則否紹興二十七年六月戶部
王侍郎師心辭給事中亦降不允詔書蓋舊官合答
詔也是歲九月權禮部賀侍郎允中除給事中辭免
亦降詔乃誤襲王例非故事也三十年正月權工部
王侍郎晞亮遷夕拜不復降詔得之矣明年九月權
禮部金侍郎安節亦遷夕拜又誤降詔自後往往無
定論院官隨事申明改正為善

淳熙玉堂雜紀卷中

淳熙玉堂雜紀卷下

諮報見於金坡遺事元豐三年八月丙申亦詔於尚書省樞密院用諮報至今守之其制首題學士院諮報尚書省或中書門下樞密院次入詞云云末云右謹具諮報某省伏候裁旨後題年月學士押字雖中間權臣用事官失其職獨此不廢又三省密院於百司例用劄付惟學士院云劄送他官司得省劄必前連片紙書所受月日乃敢押字惟學士院徑判押其首又吏魁有錄事曹案日房皆稍擬中書尊內庭也祖宗時內制多避兩府親嫌亦有不許避者蘇文忠公之於弟文定公是也然終不自安乞郡而去紹興初范元良沖除學士以趙丞相鼎姻家特復置侍讀

學士以處之及秦丞相檜當國兄梓實為學士子燻繼為學士承旨亦嘗為禮部侍郎雖並緣元祐故事其實非也

國初凡為學士官至八座已罷職或再來直院神宗改官制後中丞并權六曹尚書若兼內制亦止云直學士院舒亶等是也中興初詹又已為龍圖閣學士猶曰權直院其他如正侍郎已下多帶兼權汪藻等是也厥後程克俊林待聘楊愿等初以給舍兼權稍久乃落權字以為恩數至正尚書則帶兼權學士胡交修等是也乾道三年洪景盧邁奏請自庶官遷侍從便落權字正兼直院故先以起居郎權直院既遷中書舍人即落權字庚寅秋予以少蓬兼權直

院明年正除權禮部侍郎吏引近制申明合正爲直
院予固抑之兼權如故翰長王日嚴嚴亦不復問其
後王季海淮以太常少卿兼權直院既除三字即徑
落權遂爲定例淳熙五年十二月必大自翰林遷禮
書乃正兼學士蓋上所兼之官在正官下者皆不帶
權非舊例也六年十一月遷吏書又升兼學士承旨
且有內批付院云天官事繁今後非特旨撰述其餘
並免

上自登極至今將二十年正除翰苑纔七八人皆登

二府惟王日嚴以年踰七十除端明殿學士而去

乾道癸巳曾丞相懷鄭參政聞張樞密說在二府或

薦新改官正字崔大雅興詩入內庭以其資淺乃創

翰林權直之名月俸減學士直院三之一自學士承旨至庶官

兼權直院者院中餐錢不減明年冬以父憂去尋丁

母憂戊戌秋服闋復召為密院編修官史丞相浩當

國下史院討論兼職名稱遂改為學士院權直蓋以

翰林乃內諸司總名難專指學士院也

淳熙己亥明堂大禮崔大雅已遷著作權直如故糧

料院止隨其官幫支賜二十疋兩大雅以狀申秘書

省省申朝廷趙丞相將上取旨遂用月俸例支學

士三之二 祖宗試文多在學士院近歲惟試館職

耳既得省劄召某人試即下太史局擇日報內侍省

差官一員充監門前一日學士宿院進策題候內批

依次早乃引試支左藏庫錢三十緡充餐錢試畢錄

策題并試卷依紹興三十年司諫何通遠溥以為言

太上欲復故事而人頗憚試首召朱熙載等次召劉

儀鳳等皆辭不就 太上諭湯丞相思退等擇二人

必令試且云蘇軾中制科猶試况餘人乎於是予以

及同年程泰之大昌應詔具宣 上旨乃不敢辭已

而 太上欲除校書郎或謂過江選人無此例止除

正字乾道六年九月予以祕書少監寓直翰苑發策

試王仲衡希呂嘗賦詩寄程同年云當年給札踏金

鑾重到依然九月寒學士策詢學士策館職亦合祕

書官試祕書官自憐綠鬢非前度尚喜青衫總一般

時予寄語浙東程閣老程時為浙東提刑兼權莫矜

服綠帥事亦嘗暫直翰苑紅旆笑儒酸程荅詩末句云有底滑稽堪羨處金蓮

紅旆笑儒酸程荅詩末句云有底滑稽堪羨處金蓮

燭底話窮酸始予庚辰九月與程同試兩人名皆有
大字明年試蔣芾蒞燁姓名俱連草頭又明年試王
東里程千里名連里字頻歲偶爾亦可書也按祖
宗朝館職者指昭文集賢史館之職也在內多升修
注出外則爲帶職凡轉官奏補恩數皆厚故艱其選
必試而後除亦以限止無能之人自神宗罷館職
止是祕書省官與其他職事官無當不當尚循館職
之名況狀元不試餘人多徑除著作丞郎所試者校
書正字而已舊制云試前一日學士宿院故元祐中
蘇文忠公與鄧文惠公溫伯各進策題禁中點用文
忠所作及予與程同試時學士洪景嚴兵部尚書兼
權學士楊元老椿亦並入至是予與鄭仲益同直鄭

為長官典故浸移乃始輪入不敢強之其後予再直
丙申二月召試許蒼舒遂修故事約程元成叔達並
入策題則輪撰

隆興初 上用 真宗故事輪講筵學士院官直宿

禁林每夕兩員以備宣引咨訪往往賜酒留款其後
以兩人難獨召若同召則議論難盡止命一員遞宿
自後益遴其選或國忌妨行香若有故員少及大暑
皆權免間遇除授宣鎖講筵官已入直率聞命蒼皇
而出至有不及伺候從吏借馬於內諸司者或偶值
本院官直宿就留鎖院若大除拜當有錫賜則不繫

當日與否往往特宣云每直兩日謂
之頭直末直

紹興辛巳明堂禮成以完顏亮背盟十月四日詔今

次明堂大禮合加恩臣僚權宜不鎖院不宣麻止降制給告並免辭免候事定日依舊隆興二年邊事改卜郊乾道二年冬雷罷二相皆未暇舉行乾道六年必大始奏復舊制

內制名色不一倣直時或未詳其體式故凡詞頭之小者院吏必以片紙錄舊作於前謂之屏風兒予嘗跋王岐公蘇文定公詔草及謝表備言之至今不廢蓋其來久矣國初陶穀謂一生依本畫葫蘆殆謂是耶

凡鎖院或親被旨或受熟狀本院即關閣門今月某日有鎖院事閣門得之即關報御史臺集文臣職事官承務郎釐務官通直郎已上明日赴文德殿聽麻

宰相樞密皆不往惟輪參知政事一員押麻卷自
內出閣門啓御封兩吏對展宣贊舍人南面搢笏以
手大聲擿首尾詞及階位姓名下數句并所除之官
而讀之不盡宣也聽訖知閣門官以授參政參政付
中書吏百官不拜而退若詔令及冊后之類則宰
執文武百僚俱入文亦盡讀舞然後退

禁中以鎖院為重淳熙三年慶壽赦凡降麻官合
加恩者用辛巳明堂例免鎖院宣制仍勿辭免九月
三日中書進熟狀魏王愷恩平郡王璩永陽郡王居
廣並加食邑食實封只乞降付院草制內夫人失於
詳闕宣鎖程直院是夜進草明日告廷如式又明日
內批付密院典字直筆吳慶慶降充紫霞帔不令供

職主管大内公事慶國淑懿夫人劉從信降兩字夫人蓋懲其誤也

凡非時宣召院官侍從已下及外官而内引者同紫窄衫絲絢行入

殿廊有小黃門來道至便坐上服紅半臂忌前黃用黃

門贊拜揖升殿奏對訖上曰且坐先已設小兀子

得旨則側身虛揖而坐將退黃門贊云宣坐賜茶於

是中官進御前者忠佐授臣僚者賜酒亦然所用杯

不同侑以果實一釘其器分大小若二府則黃門雙

導上亦服窄衫宰相樞使坐高兀子執政紫團坐

而低賜茶酒亦如之或曲宴則酒五行亦或加多每

杯賜食初無定制

中興後凡除拜節鉞以上多由中書進熟狀院吏云

鎖中左者文臣也右選者武臣也逐房臨時呼院吏取索是以知之惟草后妃太子宰相麻則不容知快行數十輩來宣召云鎖小殿子既至便殿 上服帽帶諭以除授之意御前列金器如硯匣壓尺筆格糊板水滴之屬幾二百兩既書除目隨以賜之隆興初猶用此例乾道以後止設常筆硯而已退則有旨打造不及例賜牌子金百兩立后升儲倍之

凡除拜加恩官在都下者既宣麻而院吏私錄本走報希覬贈遺初無公移也而被受之官辭免者多云準學士院報麻除授云云此非典故不應相承以爲

例

獎諭臣僚或降詔或勅書院中自有定式近歲如大

理獄空及監司守臣有勞績若是庶僚皆合降勅書
三省樞密院往往誤批降詔院吏隨所得旨而行不
敢正也

翰苑印以翰林學士院印六字為文背鐫景德二年
少傅監鑄上兩字微刻自南渡京百司印無如此久
者尚書六曹惟禮部印是舊物然亦元豐改官制後
所鑄蓋文書稍簡故不刻耳

紹興辛巳五月詔學士院權寓皇城司而以院為
欽宗几筵殿終制復舊

學士院舊號北門今在行宮和寧門內蓋沿北門之
制地迫皇城極為窄隘汪尚書應辰兼權學士時

上屢令增葺竟以無地步而輟廳後即堂緣近歲院

官止二頁故分東西兩閣中有小龜頭榜曰摘文堂
蓋在京 徽宗因廣直廬御書以賜強承旨淵明今
乃汪彥章內翰藻所篆 太上又嘗書玉堂二字賜
學士周茂振鱗之刻石廳上

東閣窻下甃小池久無雨則涸傍植金沙月桂之屬
又有海棠郁李玉繡毬各一株西偏植金橘逼城根
株不能大花開時香滿院結實雖小而甘浙中未易
得也淳熙己亥夏侍講兵部尚書兼給事中王仲衡
入直示兩絕句云玉堂晝永暑風微款款飛花落小
池徙倚幽欄憑問訊夏鶯飛出萬年枝小池倒影弄
餘輝照耀虛簷極出奇木杪不鳴風力軟闌萍翻藻
有魚嬉予次韻云東省南宮切太微夔龍行集鳳皇

池更哦殿閣薰風句坐覺微涼生桂枝紫禁同依日
月輝蒼顏獨愧羽毛竒水如明鏡雖堪俯笑汝星星
誰肯嬉予嘗發策試仲衡至是同為八座俱在講筵
唱酬頗多是時詩及院中景物故記於此

朝殿日皇太子宰相親王使相參政各有朱衣史二

人自下馬處前導至殿門

樞密使恩數依宰臣者同若知院及副樞簽書則紫

衣此外惟翰林學士有之又禁門內許以茶鐐擔子
自隨與執政等

車駕將出孟享或過宮則應奉官及侍從以上朝于
後殿宰執有奏事侍從先退例過玉堂少憩若值冬
至元正則團拜堂上俟駕過就院門外上馬以從南
渡以來朝臣遇節序賜予多權停今經筵寒食重午

冬至尚賜節料錢酒其他侍從則三大節客省簽賜

羊酒米麩而學士院官若侍從以上兼領自從本官

或庶僚權直院獨三伏賜冰一擔時果五品品纔一

楪亦因與經筵官輪宿而得之書局自有中官承受

學士院無淳熙乙未初伏必大以待制侍講賜流香

酒四斗後二年減半時果七楪冰一擔視庶官直院為稍

增以短表謝支快行家食錢三千又折酒錢三百別

賜冰一擔翰林司關子云限支食錢一千蓋侍從所

得者

十月旦賜錦襖子學士院觀察使簇四金鷄尚書執

政八搭暈錦宰臣使相天下樂例從左帑帑支得不

以時臨期隨品色假為領袖施之朝服三日而止識

者非之予自翰苑遷八座己亥十月值從駕恭謝景靈宮兵部尚書王仲衡未達朝儀弟用市錦予告之故計無所出予輟所服與之而馳取舊金鷄者自用暨追班閤門吏魁趙軫與其徒顧予諛語予悟其意呼而告以錐班尚書猶兼翰林學士故可捨高從卑軫等愧謝而退

渡江後每遇開講罷講臨安治具侍講讀修注官紹

興三十二年冬予為左史趙清卿

子瀟

知臨安初獻

議盡罷百司饋送及所供飲饌時洪景嚴以內翰兼侍讀開講日學士院自置酒五行是後遂為例乾道六年予與鄭仲益兼直院鄭兼侍講是秋開講鄭主席謂予亦院官當與其事予但簽書招客之目而以

不兼講讀不赴坐時胡邦衡銓以工侍兼侍講坐中
賦覃字韻詩見及予次其韻有云寓直敢同東道主
蓋謂是也

翰林學士初上舊制勅設甚盛 中興後不復舉行
予直院時除王日嚴爲學士院中支餐錢具五杯而
已

故事大宴未再坐間學士院常爲館閣官具食蓋
祖宗時内外制官無不自三館出館中之人往往前
日僚友之舊道義之交不專以勢利高下爲心故每
於是日小集從容談笑也近時具食雖如故乃設於
學士院門幕次內蓋未嘗見玉堂主人也竊意前輩
不爾淳化中 太宗以飛白玉堂等四字賜翰林而

學士承旨蘇易簡會兩制於玉堂直祕閣潘謹脩與
焉略可見也已上乃近世程致道俱麟臺故事所記
乾道七年天申節貢院賜齋筵予時以少蓬兼內直
乃督院吏治具吏白厨庫乏錢兼近已不講予曰故
事既難廢況予身貳祕書而罷此禮乎命如故例然
不過盤飧之類爾

必大久在翰苑獨負之日常多率數月輒丐去上
必批降詔不允院吏申省乞時暫差官撰述乃委中
書舍人如此再三遂爲定例徑封奏劄付中書後省
數年來上數令薦詞臣爲代明示大用意必大每
退避戊戌九月丁丑御藥院傳旨問近例院官有無
三負者吏具上初政承旨洪遵學士史浩直院劉

珙又問紹興間故事吏復具八年曾開勾龍如淵皆
為直院而召孫近承旨三十一年何溥為學士虞允
文劉珙並直院後旬餘崔大雅服闋還朝 上曰卿
來適其時遂再兼權直十月復增莫子齊濟尋卒其
後繼增趙大本彥中熊子復克予遂參預

淳熙玉堂雜紀卷下





必大試館職時

不

陰

藏書

太上稱其文諭宰執陳公康伯朱公倬云他日令掌制

今上受禪兩月自六察擢左史初對

玉音云向在王邸見卿詞科擬制雅宜代言不旋踵遂兼三字其後兩入翰苑首尾十年自權直院至學士承旨皆徧為之其荷

兩朝知遇至矣歲月既久凡涉典故及見聞可紀者輒筆之淳熙庚子進位二府蘇易簡玉堂之思每切于中因命小子綸裒為一編略加訂其間多

涉幾微非止温木或刪或留僅得五十餘條前後脞錄辭無詮次釐為三卷或可附洪氏翰苑羣書

後云壬寅八月十二日周必大題

朝佐頃者官桂陽獲觀

今丞相周公鑿坡錄愛而傳之茲如武林又得其
玉堂雜紀益聞所未聞蓋中興以來

九重之德美前輩之典刑恩數之異同典故之沿革皆因事而見之此尤不可不傳也乃手抄一通藏於家竊聞公在翰苑知無不言

朝廷有大命令人所不敢議者公從容敷奏皆當上意凡所以障隄狂瀾護養元氣者豈止一事而公不書何其謙也然盛德偉烈表表在人耳目公雖不書其能使之弗傳哉紹熙元年重五日樵溪

丁朝佐謹書

丞相益公玉堂雜紀一編森得之久矣字畫間有
舛誤每苦其難讀近訪丁懷忠觀甘泉書藏懷忠
不知森有此書出以相示森曰明月夜光天下之
所同寶也子獨能私有之乎亟假其本而參訂之
因系歲月于後紹熙辛亥仲夏一日眉山蘇森謹
題



獨斷卷上

漢左中郎將陳留蔡

邕撰



漢天子正號曰皇帝自稱曰朕臣民稱之曰陛下其
言曰制詔史官記事曰上車馬衣服器械百物曰乘
輿所在曰行在所所居曰禁中後曰省中印曰璽所
至曰幸所進曰御其命令一曰策書二曰制書三曰
詔書四曰戒書

皇帝皇王后帝皆君也上古天子庖犧氏神農氏稱
皇堯舜稱帝夏殷周稱王秦承周末為漢驅除自以
德兼三皇功包五帝故并以為號漢高祖受命功德
宜之因而不改也

王者至尊四號之別名

王畿內之所稱王有天下故稱王

天王諸夏之所稱天下之所歸往故稱天王

天子夷狄之所稱父天母地故稱天子

天家百官小吏之所稱天子無外以天下為家故稱天家

天子正號之別名

皇帝至尊之稱皇者煌也盛德煌煌無所不照帝者諦也能行天道事天審諦故稱皇帝

朕我也古者尊卑共之貴賤不嫌則可同號之義也堯曰朕在位七十載皋陶與帝舜言曰朕言惠可底行屈原曰朕皇考此其義也至秦天子獨以為稱漢因而不改也

陛下者陞階也所由升堂也天子必有近臣執兵陳於陛側以戒不虞謂之陛下者羣臣與天子言不敢指斥天子故呼在陛下者而告之因卑達尊之意也上書亦如之及羣臣士庶相與言曰殿下閣下執事之屬皆此類也

上者尊位所在也太史令司馬遷記事當言帝則依違但言上不敢溲瀆言尊號尊王之義也

乘輿出於律律曰敢盜乘輿服御物謂天子所服食者也天子至尊不敢溲瀆言之故託之於乘輿乘猶載也輿猶車也天子以天下爲家不以京師宮室爲常處則當乘車輿以行天下故羣臣託乘輿以言之或謂之車駕

天子自謂曰行在所猶言今雖在京師行所至耳巡狩天下所奏事處皆為宮在京師曰奏長安宮在泰山則曰奏奉高宮唯當時所在或曰朝廷亦依違尊者所都連舉朝廷以言之也親近侍從官稱曰大家百官小史稱曰天家

禁中者門戶有禁非侍御者不得入故曰禁中孝元皇后父大司馬陽平侯名禁當時避之故曰省中今宜改後遂無言之者

璽者印也印者信也天子璽以玉螭虎紐古者尊卑共之月令曰固封璽春秋左氏傳曰魯襄公在楚季武子使公冶問璽書追而與之此諸侯大夫印稱璽者也衛宏曰秦以前民皆以金玉為印龍虎紐唯其

所好然則秦以來天子獨以印稱璽又獨以玉羣臣莫敢用也

幸者宜幸也世俗謂幸爲僥倖車駕所至民臣被其德澤以僥倖故曰幸也先帝故事所至見長吏三老官屬親臨軒作樂賜食阜帛越巾刀珮帶民爵有級數或賜田租之半是故謂之幸皆非其所當必而得之王仲任曰君子無幸而有不幸小人有幸而無不幸春秋傳曰民之多幸國之不幸也言民之得所不當得故謂之幸然則人主必慎所幸也御者進也凡衣服加於身飲食入於口妃妾接於寢皆曰御親愛者皆曰幸幸說從上章

策書策者簡也禮曰不滿百文不書於策其制長二

尺短者半之其次一長一短兩編下附篆書起年月日稱皇帝曰以命諸侯王三公其諸侯王三公之薨于位者亦以策書誅謚其行而賜之如諸侯之策三公以罪免亦賜策文體如上策而隸書以尺一木兩行唯此為異者也

制書帝者制度之命也其文曰制詔三公赦令贖令之屬是也刺史太守相劾奏申下土遷書文亦如其徵為九卿若遷京師近官則言官具言姓名其免若得罪無姓凡制書有印使符下遠近皆璽封尚書令印重封唯赦令贖令召三公詣朝堂受制書司徒印封露布下州郡

詔書者詔誥也有三品其文曰告某官官如故事是

為詔書羣臣有所奏請尚書令奏之下有制曰天子
荅之曰可若下某官云云亦曰詔書羣臣有所奏請
無尚書令奏制之字則荅曰已奏如書本官下所當
至亦曰詔

戒書戒勅刺史太守及三邊營官被勅文曰有詔勅
某官是為戒勅也世皆名此為策書失之遠矣

凡羣臣上書於天子者有四名一曰章二曰奏三曰
表四曰駁議

章者需頭稱稽首上書謝恩陳事詣闕通者也

奏者亦需頭其京師官但言稽首下言稽首以聞其
中者所請若罪法劾案公府送御史臺公卿校尉送
謁者臺也

表者不需頭上言臣某言下言臣某誠惶誠恐頓首
頓首死罪死罪左方下附曰某官臣某甲上文多用
編兩行文少以五行詣尚書通者也公卿校尉諸將
不言姓大夫以下有同姓官別者言姓章曰報聞公
卿使謁者將大夫以下至吏民尚書左丞奏聞報可
表文報已奏如書凡章表皆啓封其言密事得帛囊
盛

其有疑事公卿百官會議若臺閣有所正處而獨執
異意者曰駁議駁議曰某官某甲議以為如是下言
臣愚戇議異其非駁議不言議異其合於上意者文
報曰某官某甲議可

漢承秦法羣臣上書皆言昧死言王莽盜位慕古法

去昧死曰稽首光武因而不改朝臣曰稽首頓首非
朝臣曰稽首再拜公卿侍中尚書衣帛而朝曰朝臣
諸營校尉將大夫以下亦為朝臣

王者臨撫之別名

天子曰兆民諸侯曰萬民古之齡侯百乘之家曰百
姓百乘之家子

天子所都曰京師京水也地下之衆者莫過於水地
上之衆者莫過於人京大師衆也故曰京師也
京師天子之畿內千里象日月日月躔次千里

天子命令之別名

命出君下臣

令奉而行之

政著之竹帛
名曰政

天子父事天母事地兄事日姊事月常以春分朝日於東門之外示有所尊訓人民事君之道也秋分夕月於西門之外別陰陽之義也

天子父事三老者適成於天地人也兄事五更者訓於五品也更者長也更相代至五也能以善道改更已也又三老老謂久也舊也壽也皆取首妻男女完具者古者天子親袒割牲執醬而饋三公設几九卿正履使者安車輦輪送迎而至其家天子獨拜于屏其明旦三老詣闕謝以其禮過厚故也又五更或爲叟叟老稱與三老同義也

三代建正之別名

夏以十三月爲正十寸爲尺律中大簇言萬物始簇而生故以爲正也

殷以十二月爲正九寸爲尺律中大呂言陰氣大勝助黃鍾宣氣而萬物生故以爲正也

周以十一月爲正八寸爲尺律中黃鍾言陽氣踵黃泉而出故以爲正也

三代年歲之別名

唐虞曰載載歲也言一歲莫不覆載故曰載也夏曰歲一曰稔也商曰祀周曰年

閏月者所以補小月之減日以正歲數故三年一閏五年再閏

天子諸侯后妃夫人之別名

天子之妃曰后后之言後也諸侯之妃曰夫人夫人之言扶也大夫曰孺人孺之言屬也士曰婦人婦之言服也庶人曰妻妻之言齊也公侯有夫人有世婦有妻有妾皇后赤綬玉璽貴人綈綬金印綈綬色似綠

天子后立六宮之別名

三夫人帝嚳有四妃以象后妃四星其一明者為正妃三者為次妃也九嬪夏后氏增以三三而九合十二人春秋天子取十二夏制也二十七世婦殷人又增三九二十七合三十九人八十一御女周人上法帝嚳正妃又九九為八十一增之合百二十人也天子一取十二女象十二月三夫人九嬪諸侯一取九

女象九州一妻八妾卿大夫一妻二妾士一妻一妾王者子女封邑之差

帝之女曰公主儀比諸侯帝之姊妹曰長公主儀比諸侯王異姓婦女以恩澤封者曰君比長公主天子諸侯宗廟之別名

左宗廟東曰左帝牲牢三月在外牢一月在中牢一月在明牢一月謂近明堂也三月一時已足肥矣徒之三月示其潔也

右社稷西曰右宗廟社稷皆在庫門之內雉門之外天子三昭三穆與太祖之廟七七廟一壇一墀曰考廟王考廟皇考廟顯考廟祖考廟皆月祭之諸侯二昭二穆與太祖之廟五五廟一壇一墀曰考廟王考

廟皇考廟皆月祭之

大夫以下廟之別名

大夫一昭一穆與太祖之廟三三廟一壇考廟王廟四時祭之也士一廟降大夫二也上士二廟一壇考廟王考廟亦四時祭之而已自立二祀曰門曰行下士一廟曰考廟王考無廟而祭之所謂祖稱曰廟者也亦立二祀與上士同府史以下未有爵命號為庶人及庶人皆無廟四時祭於寢也

周祧文武為祧四時祭之而已去祧為壇去壇為墀有禱焉祭之無禱乃止去墀曰鬼壇謂築土起堂墀謂築土而無屋者也

薦考妣於適寢之所祭

春薦韭如夏薦麥魚秋薦黍豚冬薦稻鴈制無常牲
取與新物相宜而已

天子之宗社曰泰社天子所爲羣姓立社也天子之
社曰王社一曰帝社古者有命將行師必於此社授
以政尚書曰用命賞于祖不用命戮于社

諸侯爲百姓立社曰國社諸侯之社曰侯社 亡
國之社古者天子亦取亡國之社以分諸侯使爲社
以自儆戒屋之奄其上使不通天柴其下使不通地
自與天地絕也面北向陰示滅亡也

大夫以下成羣立社曰置社大夫不得特立社與民
族居百姓已上則共一社今之里社是也

天子社稷土壇方廣五丈諸侯半之

天子社稷皆太牢諸侯社稷皆少牢

天子為羣姓立七祀之別名

曰司命曰中霤曰國行曰國門曰泰厲曰戶曰竈
諸侯為國立五祀之別名

曰司命曰中霤曰國門曰國行曰公厲

大夫以下自立三祀之別名

曰族厲曰門曰行

五祀之別名

門秋為少陰其氣收成祀之於門祀門之禮北面設
主于門左樞戶春為少陽其氣始出生養祀之於戶
祀戶之禮南面設主於門內之西行冬為太陰盛寒
為水祀之於行在廟門外之西拔壤厚二尺廣五尺

輪四尺北面設主於拔上一作軼壤竈夏爲太陽其氣長養祀之於竈祀竈之禮在廟門外之東先席于門奧西東設主于竈陁也中霤季夏之月土氣始盛其祀中霤霤神在室祀中霤設主于牖下也

五方正神之別名

東方之神其帝太昊其神勾芒南方之神其帝神農其神祝融西方之神其帝少昊其神蓐收北方之神其帝顓頊其神玄冥中央之神其帝黃帝其神后土六神之別名

風伯神箕星也其象在天能興風雨師神畢星也其象在天能興雨明星神一曰靈星其象在天舊說曰靈星火星也一曰龍星火爲天田厲山氏之子柱及

后稷能殖百穀以利天下摠祠此三神以報其功也
漢書稱高帝五年初置靈星祠后土祠位在壬地社
神蓋共工氏之子勾龍也能平水土帝顓頊之世舉
以爲土正天下賴其功堯祠以爲社凡樹社者欲令
萬民加肅敬也各以其野所宜之木以名其社及其
野位在未地稷神蓋厲山氏之子柱也柱能殖百穀
帝顓頊之世舉以爲田正天下賴其功周棄亦播殖
百穀以稷五穀之長也因以稷名其神也社稷二神
功同故同堂別壇俱在未位土地廣博不可偏覆故
封社稷露之者必受霜露以達天地之氣樹之者尊
而表之使人望見則加畏敬也先農神先農者蓋神
農之神神農作耒耜教民耕農至少昊之世置九農

之官如左

春_也扈氏扈止農正趣民耕種鷓鴣夏扈氏農正趣民芸

除_切秋扈氏農正趣民收斂藍切冬扈氏農正趣民蓋

藏黃切棘扈氏農正常謂茅氏一曰掌人百果丹切行扈

氏農正晝為民驅鳥喙切宵扈氏農正夜為民驅獸噴切

桑扈氏農正趣民養蠶脂切老扈氏農正趣民收交鷄切

疫神帝顓頊有三子生而亡去為鬼其一者居江水

是為瘟鬼其一者居若水是為魍魎其一者居人宮

室樞隅處善驚小兒於是命方相氏黃金四目蒙以

熊皮玄衣朱裳執戈揚楯常以歲竟十二月從百隸

及童兒而時儼以索宮中毆疫鬼也桃弧棘矢土鼓

鼓旦射之以赤丸五穀播洒之以除疾殃已而立桃

人葦索儋牙虎神荼鬱壘以執之儋牙虎神荼鬱壘
二神海中有度朔之山上有桃木蟠屈三千里卑枝
東北有鬼門萬鬼所出入也神荼與鬱壘二神居其
門主閱領諸鬼其惡害之鬼執以葦索食虎故十二
月歲竟常以先臘之夜逐除之也乃畫荼壘并懸葦
索於門戶以禦凶也

四代臘之別名

夏曰嘉平殷曰清祀周曰大蜡漢曰臘

五帝臘祖之別名

青帝以未臘卯祖青帝太昊木行赤帝以戌臘午祖赤帝炎

白帝以丑臘酉祖白帝少昊金行黑帝以辰臘子祖黑帝顓頊水行

黃帝以辰臘未祖黃帝軒轅后土土行

天子大蜡八神之別名

蜡之言索也祭日索此八神而祭之也大同小異為位相對向祝曰土反其宅水歸其壑昆蟲毋作豐年若土歲取千百

先嗇

司嗇

農

郵表綴

猫虎

猫食田鼠虎食田豕迎其神而祭之坊

水庸

昆蟲

五祀之別名

祀臣五義

法施於民則祀以死勤事則祀以勞定國則祀能禦大災則祀能扞大患則祀

六號之別名

神號尊其名更為美稱若曰皇天上帝也鬼號若曰

皇祖伯其祗號若曰后土地祗也牲號牛曰一元大武羊曰柔毛之屬也齊號黍曰鄉合梁曰香萁之屬也幣號玉曰嘉玉幣曰量幣之屬也

凡祭宗廟禮牲之別名
牛曰一元大武豕曰剛鬣豚曰膾肥羊曰柔毛雞曰翰音犬曰羹獻雉曰䟽趾兔曰明視

凡祭號牲物異於人者所以尊鬼神也脯曰尹祭稟魚曰商祭鮮魚曰艇祭水曰清滌酒曰清酌黍曰薌合梁曰香萁稻曰嘉䟽鹽曰鹹醴玉曰嘉玉幣曰量幣

太祝掌六祝之辭

順祝順豐年也年祝求永貞也告祝祈福祥也化祝

弭災兵也瑞祝逆時雨寧風旱也策祝遠罪病也

宗廟所歌詩之別名

清廟一章八句洛邑既成諸侯朝見宗祀文王之所
歌也 維天之命一章八句告太平於文王之所歌
也 維清一章五句奏象武之歌也 烈文一章十
三句成王即政諸侯助祭之所歌也 天作一章七
句祝先王公之所歌也 昊天有成命一章七句郊
祀天地之所歌也 我將一章十句祀文王於明堂
之所歌也 時邁一章十五句巡守告祭柴望之所
歌也 執競一章十四句祀武王之所歌也 思文
一章八句祀后稷配天之所歌也 臣工一章十五句
諸侯助祭遣之於廟之所歌也 噫嘻一章八句春

夏祈穀于上帝之所歌也 振鷺一章八句二王之
後來助祭之所歌也 豐年一章七句蒸嘗秋冬之
所歌也 有瞽一章十三句始作樂合諸樂而奏之
所歌也 潛一章六句季冬薦魚春獻鮪之所歌也
雍一章十六句禘太祖之所歌也 載見一章十四
句諸侯始見于武王廟之所歌也 有客一章十二
句微子來見祖廟之所歌也 武一章七句奏大武
周武所定一代之樂所歌也 閔予小子一章十一
句成王除武王之喪將始即政朝於廟之所歌也
訪落一章十二句成王謀政於廟之所歌也 敬之
一章十二句羣臣進戒嗣王之所歌也 小毖一章
八句嗣王求忠臣助已之所歌也 載芟一章三十

一句春耕田祈社稷之所歌也 良耜一章二十三句秋報社稷之所歌也 絲衣一章九句繹賓尸之所歌也 酌一章九句告成大武言能酌先祖之道以養天下之所歌也 桓一章九句師祭講武類禡之所歌也 賚一章六句大封於廟賜有德之所歌也 般一章七句巡狩祀四嶽河海之所歌也 右詩三十一章皆天子之禮樂也

五等爵之別名

一本云周制也

三公者天子之相相助也助理天下其地封百里侯者侯也侯逆順也其地方百里伯者白也明白於德其地方七十里子者滋也奉天王之恩德其地方五十里男者任也立功業以化民其地方五十里

守者秦置也秦兼天下置三川守伊河洛也漢改曰河南守武帝會曰太守世祖都洛陽改曰正諸侯大小之差

諸侯王皇子封為王者稱曰諸侯王徹侯羣臣異姓有功封者稱曰徹侯武帝諱改曰通侯或曰列侯也朝侯諸侯有功德者天子特命為朝侯位次諸卿王者耕藉田之別名

天子三推三公五推卿諸侯九推

三代學校之別名

夏曰校殷曰庠周曰序天子曰辟雍謂流水四面如璧以節觀者諸侯曰類宮類言半也義亦如上

五帝三代樂之別名

黃帝曰雲門顓頊曰六莖帝嚳曰五英堯曰咸池舜曰大韶一曰大招夏曰大夏殷曰大濩周曰大武天子八佾八八六十四人八者象八風所以風化天下也公之樂六佾象六律也侯之樂四佾象四時也朝士卿朝之法

左九棘孤卿大夫位也羣臣在其後右九棘公侯伯子男位也羣吏在其後三槐三公之位也州長衆庶在其後

四代獄之別名

唐虞曰士官史記曰臯陶爲理尚書曰臯陶作士夏

曰均臺周曰囹圄漢曰獄

四夷樂之別名王者必作四夷之樂以定天下之歡

心祭神明和而歌之以管樂為之聲
東方曰靺南方曰任西方曰株離一作禁北方曰禁一作

獨斷卷上

獨斷卷下

漢左中郎將陳留蔡邕撰

易曰帝出于震震者木也言宓犧氏始以木德王天下也木生火故宓犧氏沒神農氏以火德繼之火生土故神農氏沒黃帝以土德繼之土生金故黃帝沒少昊氏以金德繼之金生水故少昊氏沒顓頊氏以水德繼之水生木故顓頊氏沒帝嚳氏以木德繼之木生火故帝嚳氏沒帝堯氏以火德繼之火生土故帝舜氏以土德繼之土生金故夏禹氏以金德繼之金生水故殷湯氏以水德繼之水生木故周武以木德繼之木生火故高祖以火德繼之

伏犧為太昊氏炎帝為神農氏黃帝為軒轅氏少昊

為金天氏顓頊為高陽氏帝嚳為高辛氏帝堯為陶唐氏帝舜為有虞氏夏禹為夏后氏湯為殷商氏

武王為周

高祖為漢

高帝 在位十二年 生惠帝

惠帝 七年 無後

呂后攝政 八年立惠帝弟 代王為文帝

文帝 二十三年 生景帝

景帝 十六年 生武帝

武帝 五十四年 生昭帝

昭帝 十三年 無後立元 衛太子孫為宣帝

宣帝 二十五年 生元帝

元帝 生十六年

成帝 定二十六年無後立弟

哀帝 山五年無後立弟中

平帝 莽五年王

王莽 聖十六年劉

聖公 武二年光

光武 生明帝三年

明帝 生章帝十八年

章帝 生和帝十二年

和帝 生殤帝十七年

殤帝 河一年無後取清

安帝 生順帝十九年

順帝十九年

沖帝一年無後取和帝孫

質帝一年無後取河間敬王

桓帝二十一年無後取解

靈帝二十二年生史侯董卓殺之

從高帝至桓帝三百八十六年除王莽劉聖公三百

六十六年從高祖乙未至今壬子歲四百一十年呂

后王莽不入數高帝以甲午歲即位以乙未為元

帝嫡妃曰皇后帝母曰皇太后帝祖母曰太皇太后

其眾號皆如帝之稱秦漢已來少帝即位后代而攝

政稱皇太后詔不言制漢興惠帝崩少帝弘立太后

攝政哀帝崩平帝幼孝元王皇太后以太皇太后攝政

三
千乘樂安勃海質
首王夷王孝王帝

河間蠡吾相
孝王侯翼帝

解續解續靈獻
稟後稟後稟帝

文帝弟雖在三禮兄弟不相為後文帝即高祖子於
惠帝兄弟也故不為惠帝後而為第二宣帝弟次昭
帝史皇孫之子於昭帝為兄孫以係祖不得上與父
齊故為七世光武雖在十二於父子之次於成帝為
兄弟於哀帝為諸父於平帝為父祖皆不可為之後
上至元帝於光武為父故上繼元帝而為九世故河
圖曰赤九世會昌謂光武也十世以光謂孝明也十
一以興謂孝章也成雖在九哀雖在十平雖在十一
不稱次

宗廟之制古學以爲人君之居前有朝後有寢終則前制廟以象朝後制寢以象寢廟以藏主列昭穆寢有衣冠几杖象生之具摠謂之宮月令曰先薦寢廟詩云公侯之宮頌曰寢廟奕奕言相連也是皆其文也古不墓祭至秦始皇出寢起之於墓側漢因而不改故金陵上稱寢殿有起居衣冠象生之備皆古寢之意也居西都時高帝以下每帝各別立廟月備法駕遊衣冠又未定迭毀之禮元帝時丞相匡衡御史大夫貢禹乃以經義處正罷遊衣冠毀先帝親盡之廟高帝爲太祖孝文爲太宗孝武爲世宗孝宣爲中宗祖宗廟皆世世奉祠其餘惠景以下皆毀五年而稱殷祭猶古之禘祫也殷祭則及諸毀廟非殷祭則

祖宗而已光武中興都洛陽乃合高祖已下至平帝
爲一廟藏十一帝主於其中元帝於光武爲禰故雖
非宗而不毀也後嗣遵承遂常奉祀光武舉天下以
再受命復漢祚更起廟稱世祖孝明臨崩遺詔遵儉
毋起寢廟藏主於世祖廟孝章不敢違是後遵承藏
主於世祖廟皆如孝明之禮而園陵皆自起寢廟孝
明曰顯宗孝章曰肅宗是後踵前孝和曰穆宗孝安
曰恭宗孝順曰敬宗孝栢曰威宗唯殤沖質三少帝
皆以未踰年而崩不列於宗廟四時就陵上祭寢而
已今洛陽諸陵皆以晦望二十四氣伏社臘及四時
曰上飯太官送用園令食監典省其親陵所宮人隨
鼓漏理被枕具盥水陳嚴具天子以正月五日畢供

後上原陵以次周徧公卿百官皆從四姓小侯諸侯家婦凡與先帝先后有瓜葛者及諸侯王大夫郡國計吏匈奴朝者西國侍子皆會尚書官屬陞西除下先帝神座後大夫計吏皆當軒下占其郡穀價四方災異欲皆使先帝魂神具聞之遂於親陵各賜計吏而遣之正月上丁祠南郊禮畢次北郊明堂高祖廟世祖廟謂之五供五供畢以次上陵也四時宗廟用牲十八太牢皆有副倅西廟五主高帝文帝武帝宣帝元帝也高帝爲高祖文帝爲太宗武帝爲世宗宣帝爲中宗其廟皆不毀孝元功薄當毀光武復天下屬弟於元帝爲子以元帝爲禰廟故列於祖宗後嗣因承遂不毀也

東廟七主光武明帝章帝和帝安帝順帝相帝也光武為世祖明帝為顯宗章帝為肅宗和帝為穆宗安帝為恭宗順帝為敬宗相帝為威宗廟皆不毀少帝未踰年而崩皆不入廟以陵寢為廟者三殤帝康陵沖帝懷陵質帝靜陵是也追號為后者三章帝宋貴人曰敬隱后葬敬北陵安帝祖母也清河孝德皇后安帝母也章帝梁貴人曰恭懷后葬西陵和帝母也安帝張貴人曰恭敏后葬北陵順帝母也

兩廟十二主三少帝三后故用十八太牢也

漢家不言禘祫五年而再殷祭則西廟惠帝景昭皆別祠成哀平三帝以非光武所後藏主長安故高廟四時祠於東廟京兆尹侍祠衣冠車服如太常祠行

陵廟之禮順帝母故云姓李或姓張高祖得天下而
父在上尊號曰太上皇不言帝非天子也孝宣繼孝
昭帝其父曰史皇孫祖父曰衛太子太子以罪廢及
皇孫皆死宣帝但起園陵長承奉守不敢加尊號於
祖父也光武繼孝元亦不敢加尊號於父祖也世祖
父南頓君曰皇考祖鉅鹿都尉曰皇祖曾祖鬱林太
守曰皇曾祖高祖舂陵節侯曰皇高祖起陵廟置章
陵以奉祠之而已至殤帝崩無子弟安帝以和帝兄
子從清河王子即尊號依高帝尊父爲太上皇之義
追號父清河王曰孝德皇順帝崩沖帝無子弟立樂
安王子是爲質帝帝偏於順烈梁后父大將軍梁冀
未得尊其父而崩相帝以蠡吾侯子即尊位追尊父

蠡吾先侯曰孝崇皇母偃太夫人曰孝崇后祖父河
間孝王曰孝穆皇祖母妃曰孝穆后相帝崩無子今
上即位追尊父解犢侯曰孝仁皇母董夫人曰孝仁
后祖父河間敬王曰孝元皇祖母夏妃曰孝元后
天子太社以五色土為壇皇子封為王者受天子之
社土以所封之方色東方受青南方受赤他如其方
色苴以白茅授之各以其所封方之色歸國以立社
故謂之受茅土漢興以皇子封為王者得茅土其他
功臣及鄉亭他姓公侯各以其戶數租入為限不受
茅土亦不立社也

漢制皇子封為王者其實古諸侯也周末諸侯或稱
王而漢天子自以皇帝為稱故以王號加之摠名諸

侯王子弟封爲侯者謂之諸侯羣臣異姓有功封者謂之徹侯後避武帝諱改曰通侯法律家皆曰列侯功德優盛朝廷所異者賜位特進位在三公下其次朝侯位次九卿下皆平冕文衣侍祠郊廟稱侍祠侯其次下士但侍祠無朝位次小國侯以肺腑宿衛親公主子孫奉墳墓在京者亦隨時見會謂之猥朝侯也

巡狩校獵還公卿以下陳洛陽都亭前街上乘輿到公卿下拜天子下車公卿親識顏色然後還宮古語曰在車則下惟此時施行

正月朝賀三公奉璧上殿向御座北面太常贊曰皇帝爲君興三公伏皇帝坐乃進璧古語曰御坐則起

此之謂也舊儀三公以下月朝後省常以六月朔十月朔旦朝後又以盛暑省六月朝故今獨以為正月十月朔朝也冬至陽氣始起麋鹿解角故寢兵鼓身欲寧志欲靜不聽事送迎五日臘者歲終大祭縱吏民宴飲非迎氣故但送不迎正月歲首亦如臘儀冬至陽氣起君道長故賀夏至陰氣起君道衰故不賀鼓以動衆鍾以止衆夜漏盡鼓鳴則起晝漏盡鍾鳴則息也

天子出車駕次第謂之鹵簿有大駕有小駕有法駕大駕則公卿奉引大將軍參乘太僕御屬車八十一乘備千乘萬騎在長安時出祠天於甘泉備之百官有其儀注名曰甘泉鹵簿中興以來希用之先帝時

時備大駕上原陵他不常用唯遭大喪乃施之法駕公卿不在鹵簿中唯河南尹執金吾洛陽令奉引侍中參乘奉車郎御屬車三十六乘北郊明堂則省諸副車小駕祠宗廟用之每出太僕奉駕上鹵簿於尚書中中常侍侍御史主者郎令史皆執注以督整諸軍車騎春秋上陵令又省於小駕直事尚書一人從令以下皆先行

法駕上所乘曰金根車駕六馬有五色安車五色立車各一皆駕四馬是爲五時副車俗人名之曰五帝車非也又有戎立車以征伐三蓋車名耕根車一名芝車親耕藉田乘之又有蹋猪車慢輪有畫田獵乘之綠車名曰皇孫車天子孫乘之以從

凡乘輿車皆羽蓋金華爪黃屋左纛金鏤方釤繁纓
重轂副牽

黃屋者蓋以黃為裏也

左纛者以整牛尾為之大如斗在最後左駢馬駿上
金鏤者馬冠也高廣各四寸如玉華形在馬駿前方
釤者鐵廣數寸在駿後有三孔插翟尾其中繁纓在
馬膺前如索帶者是也

重轂者轂外復有一轂施牽其外乃復設牽施銅金
鏤形如緹亞飛輪以緹油廣八寸長注地左畫蒼龍
右白虎繫軸頭今二千石亦然但無畫耳

前驅有九旒雲罕闕戟皮軒鑾旗車皆大夫載鑾旗
者編羽毛引繫撞旁俗人名之曰雞翹車非也後有

金鉦黃越黃門鼓車古者諸侯貳車九乘秦滅九國兼其車服故大駕屬車八十一乘也尚書御史乘之最後一車懸豹尾以前皆皮軒虎皮爲之也

永安七年建金根耕根諸御車皆一轅或四馬或六馬金根箱輪皆以金鑄正黃兩臂前後刻金以作龍虎鳥龜形上但以青縑爲蓋羽毛無後戶

冕冠周曰爵弁殷曰冔夏曰收皆以三十升漆布爲殼廣八寸長尺二寸加爵冕其上周黑而赤如爵頭之色前小後大殷黑而微白前大後小夏純黑而赤前小後大皆有收以持笄詩曰常服黼冔禮朱干玉戚冔而舞大武周書曰王與大夫盡弁古皆以布中古以絲孔子曰麻冕禮也今也純儉漢雲翹冠樂祠

天地五郊舞者服之冕冠垂旒周禮天子冕前後垂延朱綠藻有十二旒公侯大夫各有差別漢興至孝明帝永平二年詔有司採尚書臯陶篇及周官禮記定而制焉皆廣七寸長尺二寸前圓後方朱綠裏而玄上前垂四寸後垂三寸係白玉珠于其端是爲十二旒組纓如其綬之色三公及諸侯之祠者朱綠九旒青玉珠卿大夫七旒黑玉珠皆有前無後組纓各視其綬之色旁垂黹纁當耳郊天地祠宗廟祀明堂則冠之衣黼衣佩玉珮履絢履孔子曰服周之冕鄙人不識謂之平天冠

天子冠通天冠諸侯王冠遠遊冠公侯冠進賢冠公王三梁卿大夫尚書二千石博士冠兩梁千石六百

石以下至小吏冠一梁天子公卿特進朝侯祀天地
明堂皆冠平冕

天子十二旒三公九諸侯卿七其纓與組各如其綬
之色衣玄上纁下日月星辰山龍華蟲祠宗廟則長
冠裼玄其武官太尉以下及侍中常侍皆冠惠文冠
侍中常侍加貂蟬御史冠法冠謁者冠高山冠其鄉
射行禮公卿冠委貌衣玄端執事者皮弁服宮門僕
射冠却非大樂郊社祝舞者冠建華其狀如婦人縷
簾迎氣五郊舞者所冠亦爲冕車駕出後有巧士冠
其冠似高山冠而小

幘者古之卑賤執事不冠者之所服也孝武帝幸館
陶公主家召見董偃偃傳青繡綠幘主贊曰主家庖

人臣偃昧死再拜謁上爲之起乃賜衣冠引上殿董仲舒武帝時人其止兩書曰執事者皆赤幘知皆不冠者之所服也元帝額有壯髮不欲使人見始進幘服之羣臣皆隨焉然尚無巾如今半幘而已王莽無髮乃施巾故語曰王莽秃幘施屋冠進賢者宜長耳冠惠文者宜短耳各隨所宜

通天冠天子常服漢服受之秦禮無文遠游冠諸侯王所服展筓無山禮無文高山冠齊冠也一曰側注高九寸鐵爲卷梁不展筓無山秦制行人使官所冠今謁者服之禮無文太傅胡公說曰高山冠蓋齊王冠也秦滅齊以其君冠賜謁者

進賢冠文官服之前高七寸後三寸長八寸公侯三

梁卿大夫尚書博士兩梁千石六百石以下一梁漢制禮無文

法冠楚冠也一曰柱後惠文冠高五寸以纚裹鐵柱卷秦制執法服之今御史廷尉監平服之謂之獬豸獬豸獸名蓋一角今冠兩角以獬豸爲名非也太傳胡公說曰左氏傳有南冠而縶者國語曰南冠以如夏姬是知南冠蓋楚之冠秦滅楚以其君冠賜御史武冠或曰繁冠今謂之大冠武官服之侍中中常侍加黃金附貂蟬鼠尾飾之太傅胡公說曰趙武靈王效胡服始施貂蟬之飾秦滅趙以其君冠賜侍中齊冠或曰長冠竹裹以纚高七寸廣三寸形制如板高祖冠以竹皮爲之謂之劉氏冠楚制禮無文鄙人

不識謂之鵲尾冠

建華冠以鐵爲柱卷貫大珠九枚今以銅爲珠形制似縷簾記曰知天文者服之左傳曰鄭子臧好聚鵲冠前圖一作徒以爲此則是也天地五郊明堂月令舞者服之

方山冠以五采縠爲之漢祀宗廟大享八佾樂五行舞人服之衣冠各從其行之色如其方色而舞焉術士冠前圓吳制灑迤四重趙武靈王好服之今者不用其說未聞

巧士冠高五寸要後相通埽除從官服之禮無文却非冠宮門僕射者服之禮無文

樊噲冠漢將軍樊噲造次所冠以入項籍營廣七寸

前出四寸司馬殿門大護衛士服之

却敵冠前高四寸通長四寸後高三寸監門衛士服之禮無文

珠冕爵尋收通天冠進賢冠長冠緇布冠委貌冠皮弁惠文冠古者天子冠所加者其次在漢禮帝謚

違拂不成曰隱

靖民則法曰黃

翼善傳聖曰堯

仁聖盛明曰舜

殘人多壘曰桀

殘義損善曰紂

慈惠愛親曰孝

愛民好與曰惠

聖善同文曰宣

聲聞宣遠曰昭

剋定禍亂曰武

聰明睿智曰獻

溫柔聖善曰懿

布德執義曰穆

仁義說民曰元

安仁立政曰神

布綱治紀曰平

亂而不損曰靈

保民耆艾曰明

辟土有德曰襄

貞心大度曰匡

大慮慈民曰定

知過能改曰恭

不生其國曰聲

一德不懈曰簡

夙興夜寢曰敬

清白自守曰貞

柔德好衆曰靖

安樂治民曰康

小心畏忌曰僖

中身早折曰悼

慈仁和民曰順

一曰傾

好勇致力曰莊

恭人短折曰哀

在國逢難曰愍

名實過爽曰繆

音穆

雍遏不通曰幽

暴虐無親曰厲

致志大圖曰景

辟土兼國曰栢

經緯天地曰文

執義揚善曰懷

短折不成曰殤

去禮遠衆曰煬

怠政外交曰攜

治典不敷曰祈一曰震

獨斷卷下

右蔡氏獨斷一編古之

制度文為類於此乎考

錄本多舛今稍是正而

刻之舒類淳熙庚子六

月初吉江都呂宗孟書